


# JESUS

## ANG KAPAWA SANG KALIBUTAN



**Ang Matun-an Nimo sa Sini nga Leksyon**

Kapawa para sa Kalibutan  
Kadulom sang kalibutan  
Kapawa sang Dios

Kinaiya sang Kapawa  
Ang kapawa nagatabog sang kadulom  
Ang kapawa nagapahayag  
Ang kapawa isa ka kusog  
Ang kapawa wala sing pinilian

Balatyagon sa Kapawa  
Pagsikway  
Pagbaton

## Kapawa para sa Kalibutan

### Kadulom sang kalibutan

Nakalakat ka na bala sa madulom kag naghandum sang kasanag agud nga makakita ikaw? Indi mo mahibaloan ang mga katalagman sa tuo nga bahin ukon sa wala nga bahin, ukon sa dalan sa unhan. Mahimo nga ikaw mismo wala nakapat-od nga yara ikaw sa husto nga dalan. Tama kahapos ang madula sa madulom.

Ukon mahimo nga ginhinguyang mo ang bilog nga gab-i sa kahadlok sa katalagman nga nagaabot sa kabuhi, nahibaloan mo man ukon wala. Daw ano ang kinatuhay sang tanan sang pag-abot sang masanag, kag mainit nga silak sang adlaw. Madali mo nga mahangpan kon ngaa nga ang Biblia nagagamit sang kadulom bilang simbolo sang malaut, sayop, wala sing kapat-uran, kagamo, kag kamatayon. Ang kapawa amo ang simbolo sang kabuhi, kalipay, kamatuoran, kag sang tanan nga maayo.

Ang kadulom amo ang pagkawala sang kasanag. Ang kalibutan nahulog sa espirituhanon nga kadulom sadto gid nga tion sang napahamulag si Adam kag si Eva sa Dios. Ngaa? Bangod kay ang Dios amo ang ginahalinan sang kasanag. Kon wala Sia, magadalangdalang lamang kita sa madulom — nadula, wala nakahibalo kon sa diin nagapadulong. Ang Biblia naglaragway sining kahimtangan:

**Isaias 59:2, 9, 10.** Apang ang inyo nga kalautan nagpahamulag sa inyo kag sa inyo Dios, kag ang inyo mga sala naglipod sang iya nawong sa inyo sa bagay nga indi sia magpamati. Busa malayo sa aton ang katarungan, kag wala nagalambot sa aton ang pagkamatarung; nagapangita kita sang kapawa, apang yari karon, ang kadudolman, kag sang kasanag, apang

nagalakat kita sa kadulom. Ginapangapakap ta ang dingding kaangay sang bulag, nagapangapakap kita subong sang mga walay mata. . .

**Mga Taga Efeso 4:18.** . . . gindulman sila sa ila paghangop. . .

**1 Juan 2:11.** Apang ang nagadumot sa iya utod yara sia sa kadudolman kag nagalakat sa kadudolman, kag wala makahibalo kon diin sia nagapakadto, kag ang kadudolman nagbulag sang iya mga mata.

**Buhata Ini**

1. Ano ang kadulom?
  - ....a) Isa ka gahum sa iya kaugalingon
  - ....b) Ang pagkawala sang kasanag
  - ....k) Ang pagkawala sang panulok
2. Ano ang nagdala sang espirituhanon nga kadulom sa kalibutan?
  - ....a) kapalaran
  - ....b) ang pagkawala sang espirituhanon nga kasanag
  - ....k) sala nga nagpahamulag sang tawo sa Dios
3. Isulat ang tagsa ka tinaga sa idalum sang husto nga tig-ulo: kabuhi, kamatayon, kalipay, maayo, malaut, gugma, dumot, sayop, kamatuoran.

*Kadulom*

*Kasanag*

.....  
.....  
.....

.....  
.....  
.....

## Kapawa sang Dios

Ang Dios kapawa – ang ginhalinan sang tanan nga kasanag. Ang mga katawhan yara sa espirituhanon nga kadulom tubtob nga mabaton nila ang pinasahi nga pagpahayag sang kapawa sang Dios. Amo ina ang kabangdanan kon ngaa nga si Jesus nahimo nga Kapawa sang Kalibutan; Nagkari Sia sa paghatag sa aton sang kapawa sang Dios – sa pagpahayag sang gugma sang Dios kag sang Iya kagustohan para sa aton.

**1 Juan 1:5.** . . . ang Dios kapawa kag sa iya wala gid sing kadudolman.

**Juan 1:4.** Sa iya yara ang kabuhi, kag ang kabuhi amo ang kapawa sang mga tawo.

Pamatili ang mga tinaga ni Jesus nahanungod sa Iya kaugalingon:



**Juan 8:12.** \*Ako amo ang kapawa sa kalibutan; ang nagasunod sa akon indi maglakat sa kadudolman, kundi may kapawa nga nagahatag sang kabuhi.\*

**Juan 9:1.** \*Sa yari ako sa kalibutan, ako ang kapawa sa kalibutan.\*

Wala na kuntani ini makapatingala sa mga katawhan sa pagpamati nga si Jesus nagtawag sang Iya kaugalingon nga kapawa sang kalibutan. Ang propeta nga si Isaias nagtagna nga ang Mesias magaabot subong nga Kapawa sang Dios. Ginsambit ni Mateo ining tagna sang Daan Katipan kag nagsiling nga ini natuman sa kay Jesus:

**Mateo 4:16.** Ang katawhan nga naglingkod sa kaduldolman nakakita sing daku nga kapawa, kag sa mga naglingkod sa ginsakpan kag sa landong sang kama-tayon ang kapawa nagdilag.

### **Buhata Ini**

4. Ano ang bersikulo sa Biblia nga nagsugid sa aton nga ang Dios kapawa? . . . . .  
Sauloha ini.
  
5. Sin-o ang nagsiling: \*Ako ang kapawa sang kalibutan? \*  
. . . . .
  
6. Sauloha ang Juan 8:12. Ano ang ginsiling ni Jesus nga maangkon naton kon magsunod kita sa Iya? . . . . .

### **Kinaiya sang Kapawa**

#### **Ang kapawa nagatabog sang kadulom**

Si Jesus, ang kapawa, nagatabog sang kadulom. Ang presensya Niya sa tagipusoon nagatabog sang sala, silot sang sala, kag kahadlok. Ang Iya gugma nagatabog sang dumot. Ang Iya kapawa nagadala sang paglaum, kasigurohan, kapahuwayan kag kusog, sa kalag.

**Salmo 27:1.** Ang Ginuo akon kapawa kag akon kaluwasan; sin-o bala ang kahadlokan ko? Ang Ginuo amo ang kalig-unan sang akon kabuhi; sin-o bala ang kahangaw-an ko?



Ang kapawa mas makusog sang sa kadulom. \*Ang kadulom sa bilog nga kalibutan indi makapalong sang isa ka kandila.\* Kon yara si Jesus sa imo kabuhi, ang mga gahum sang malaut sa palibot mo kag ang madulom nga inagihan sa kabuhi indi makapalong sang Iya kapawa. May isa ka Kristohanon nga babayi nga nagmasakit sing binulan kag indi makahalin sa iya hiligdaan apang malipayon sa tanan nga tion. May isa nga namangkot sa iya kon paano sia nagmalipayon bisan nga indi gani sia makabangon sa pagtulok sang adlaw. Nagsabat sia, \*Ang akon hulot madulom apang ang Anak yari sa akon tagipusoon.\* Si Jesus nga yara sa sulod amo ang ginahalinan sang espirituhanon nga kapawa nga nagtabog sang gal-um. Ginapabahaan Niya ang kalag sang babayi sang silak sang adlaw.

**Juan 1:5.** Ang kapawa nagasilak sa kadudolman, kag ang kadudolman wala makadaug sini.

**Miqueas 7:8.** . . . kon maglingkod ako sa kadudolman ang Ginuo mangin kapawa sa akon

### Buhata Ini

7. Ano ang makatabog sang mga kahadlok, silot sang sala, sala, dumot, kag aligutgot sa tagipusoon sang isa ka tinuga?
  - ....a) Maayo nga panghunahuna.
  - ....b) Mga pagsulondan para sa maayo nga ugali.
  - ....k) Ang presensya ni Jesus sa kabuhi.
8. *Hunahunaa:* Kinahanglan mo bala si Jesus sa pagtabog sang kadulom sa imo kabuhi? Naangkon mo bala ang kapawa nga magasilak kon nagaantos ikaw ukon may palaligban?

**Ang kapawa nagapahayag**

Ang kapawa amo ang nagahatag sa aton sing kahi-gayunan nga makita ang butang suno sa ila dagway. Ang espirituhanon nga kapawa amo ang isa gid lamang ka paagi agud mahi-baloan naton ang espirituhanon nga kamatuoran. Makita naton ining kapawa sa nasulat nga Pulong sang Dios — ang Biblia — kag sa buhi nga Pulong sang Dios —



si Jesu-Kristo. Si Jesus amo ang manugpahayag kag manugbadbad sang kabuhi. Nagabulig Sia sa aton sa paghangop sang Pulong sang Dios kag ginapakita sa aton ang dalan sang Dios para sa aton. Sia mismo ang dalan.

**Juan 14:6.** Si Jesus nagsiling sa iya, 'Ako amo ang dalan, kag ang kamatuoran, kag ang kabuhi; walay nagaabot sa Amay, kundi paagi sa akon.'

Si Jesus nagabulig nga makita naton ang aton kaugalingon suno sa kon ano gid kita. Sa Iya himpit nga kabuhi kag mga ginatudlo, nakita naton kon daw ano kita kalayo sa talaksan sang Dios para sa aton. Nakita naton ang aton mga sala, ang aton bugal, pagkadalok, kag natago nga mga motibo. Ginapakita ni Jesus sa aton ang aton pagkinahanglan sang kapatawaran kag bag-o nga kabuhi nga ginatanyag Niya sa aton.

Ginapakita ni Jesus sa aton kon ano ang kaangay sang Dios kag kon paano Niya masugata ang aton mga kinahanglanon. Makita naton sa kay Jesus ang gugma sang Dios sa aton, ang Iya pagpasensya sa aton, kag sang Iya ginhatag para sa aton kaluwasan. Ginapakita Niya sa aton

kon paano naton mabaton ang Dios sa aton kabuhi kag magkalipay sa Iya kapawa sing walay katubtoban.

**2 Mga Taga Corinto 4:6.** Kay ang Dios nagsiling, 'Ang kapawa nagsilak gikan sa kadudolman, 'amo ang nagsilak sa aton mga tagipusoon sa paghatag sang kapawa sang pagkilala sang himaya sang Dios sa nawong ni Kristo.

**Mga Hebreo 1:3.** Sia nagapabanaag sang himaya sang Dios kag nagadala sang larawan gid sang iya

### Buhata Ini

9. Hingalani ang duha ka mga duog sa diin makakita kita sang kamatuoran nahanungod sa aton kaugalingon, sa Dios kag sa kabuhi.
  - a) .....
  - b) .....
10. Sauloha ang 2 Mga Taga Corinto 4:6.
11. Suno sa 2 Mga Taga Corinto 4:6, sa diin nagasilak ang himaya sang Dios? .....
12. Sa diin ginapasilak sang Dios ang Iya kapawa sa paghatag sa aton sang kapawa sang pagkilala sang himaya sang Dios? .....
13. Suno sa Mga Hebreo 1:3, ano ang ginapabanaag ni Jesus? .....
14. *Hunahunaa:* Buot mo bala makita ang himaya sang Dios sa nawong ni Jesu-Kristo?



**Ang kapawa kusog**

Ang kapawa isa ka nagabanaag nga kusog. Ang mga siyentipiko padayon nga nagatuon nahanungod sa gahum sang kapawa nga nagabanaag halin sa adlaw. Ang kusog sini isa ka kulohaang sang gahum para sa tawhanon nga paggamit. Ang mga katawhan makagamit sini sa pag-init sang ila mga puloy-an kag sa pagpaandar sang ila mga makinaryas. Apang ang pinakadaku sa tanan amo ang epekto sini sa kabuhi kag sa ikaayong lawas. Madamo nga mga tanom ang indi magtubo kon nahandongan. Ang silak sang adlaw nagapatay sang madamo nga mga mikrobyo kag nagabulig man para sa aton ikaayong lawas kag kusog. Hunahunaa ang kalibutan nga wala sing adlaw. Wala sing kainit. Wala sing kabuhi. Wala sing kusog nga magapugong sa iya sa pagpabilin sa pat-od nga landas sa kahawaan. Isa ka makusog nga bola nga nadula sa maitom nga kahawaan, padulong sa iya kalaglagaan.



Kon ano ang adlaw sa kalibutan, amo man si Jesus sa aton, ang Adlaw sang Pagkamatarung. Nagahatag Sia sang kabuhi, kainit, ikaayong lawas, kusog, kag gahum sa ila nga nagbaton sa Iya. Ang Iya gahum nagapabilin sa aton sa husto nga landas. Ginaayo Niya ang

aton lawas kag espiritu. Ang kapawa sang kabuhi nga ginahatag ni Jesus mas makusog pa sang sa kamatayon. Katulad sang tanom nga naglusot halin sa binhi kag nagbangon sa pagsugata sang silak sang adlaw, ang mga patay nga nagsunod kay Jesus magabangon sa ila lulubngan nga nasukloban sang bag-o nga lawas kag magabangon sa pagsugata sa Iya kon maebalik Sia sa kalibutan.

**Malaquias 4:2.** Apang sa inyo nga nagakahadlok sa akon ngalan magasubang ang adlaw sang pagkamarung, nga may pag-ayo sa iya mga pakpak. . .


### Buhata Ini

15. Ano ang titulo ni Jesus nga makita naton sa Malaquias 4:2? . . . . .
16. *Hunahunaa:* Paano ang isa ka tinuga nga wala si Jesus mangin katulad sang kalibutan nga wala sing adlaw? May nakilala bala ikaw nga katulad sini? Kon amo, pangayoa sa Dios nga buligan sia nga makakita kay Jesus.

### Ang kapawa wala sing pinilian

Ang kapawa para sa tanan, sa bisan diin. Katulad sang pagsilak sang adlaw sa kabukiran kag sa kapatagan, sa manggaranon kag sa imol, sa malain nga mga tawo kag sa mga buangbuang; amo man ang pagsiga sang kapawa ni Jesus para sa bilog nga kalibutan, sa maayo kag sa malain. Ang iban nga mga katawhan naghunahuna nga ang Manluluwas para lamang sa ila kaugalingon nga pungsod. Apang ginpaathag ini sang Dios nga ang kapawa sang Iya kaluwasan para sa bilog nga kalibutan.

**Juan 1:9.** Ang matuod nga kapawa nga nagaiwag sa tagsa ka tawo nagakari sa kalibutan.



**Lukas 1:78, 79.** Bangod sa malulo nga kaluoy sang aton Dios, kon ang adlaw magpamanagbanag sa aton gikan sa kahitaasan sa pag-iwag sa mga nagalingkod sa kadudolman kag sa landong sang kamatayon, sa pag-tuytoy sang aton tiil sa dalanon sang paghidait.

May isa ka bulag nga tawo nga nagalingkod sa higad sang dalan nga nagapakilimos. Nabatian niya ang guban nga nagapadulong, Nabatian niya nga si Jesus magalagi kag ang guban kaupod sa Iya. Ang manugpakilimos nakabati sang gahum ni Jesus sa pag-ayo. Nagsinggit sia sa mabaskog nga tingog: \*Jesus! Anak ni David! Kaluoyi ako!\* Ang mga katawhan nagsabdong sa iya kag ginhambalan nga maghipos. Wala sila maghunahuna nga may panahon si Jesus para sa isa lamang ka manugpakilimos. Apang si Jesus may panahon kag bulig para sa tanan nga nagatawag sa Iya. Ang manugpakilimos padayon nga nagpanawag. Nagdulog si Jesus kag ginpadala ang manugpakilimos sa Iya. Si Jesus nag-ayo sa iya.



**Lukas 18:43.** Kag sa gilayon nabaton niya ang iya itulolok kag nagsunod sa iya, nga nagahimaya sa Dios. . .

Ang kabuhi may bag-o nga kahulogan kag bag-o nga paladulongan pagkatapos nga ang manugpakilimos naka-sugata kay Jesus. Ang iya kalibutan sang kadulom nahimo nga adlaw. Wala na sing kapuslanan kon ano man sia sang una, kon sa diin man sia nagalingkod sa pagpakilimos, kon paano sia nasandad sa madulom. Karon nagalakat sia sa kapawa – indi na isa ka bulag nga manugpakilimos apang isa ka sumolunod ni Jesus ang Kapawa sang Kalibutan!

### Buhata Ini

17. Ang Juan 8:12 nagasiling nga si Jesus nagkari nga magmangin  
 ....a) kapawa para sa Iya pungod lamang.  
 ....b) adlaw sang pagkamatarung.  
 ....k) kapawa sang kalibutan.
18. Bilang katumanan sang Lukas 1:78, 79, ang Dios nagpasiga sang adlaw sang kaluwasan nga magpamanagbanag sa .....  
 gikan sa kahitaasan sa pag-iwag sa .....  
 sa kadudolman kag sa landong sang kamatayon.

Basaha liwat ang Lukas 1:78, 79 kag ibutang ang tinaga nga: *kay* kag ang *kaugalingon mo nga ngalan* sa mga blangko.

19. *Hunahunaa*: Paano nagbag-o ang kabuhi sang manugpakilimos paagi sa pagtawag kay Jesus kag sa pagsugata sa Iya? Paano mabag-o ni Jesus ang imo kabuhi kon pangayuon mo sa Iya? May mga katawhan bala sa palibot nimo nga nagakinahanglan kay Jesus? Ginatuytoy an bala nimo sila pakadto sa kay Jesus ukon ginalipasan mo lang sila?

### Balatyagon sa Kapawa

#### Pagsikway

Ang iban nga mga katawhan wala naluyag kay Jesus kag nagapamatok sa pagbaton sang Iya kapawa. Luyag nila nga magpadayon kag magpangabuhi sang kabuhi nga ila naluyagan, magsunod sang ila kaugalingon nga dalan,

kag indi magtuman sang kon ano ang ginasiling ni Jesus nga ila pagabuhaton. Sang yari pa si Jesus sa kalibutan, ang iban nga mga katawhan nagakaugot sa Iya bangod kay ang Iya ginatudlo nagapahayag sa ila kon daw ano nga sari sang mga makasasala sila. Luyag nila nga madula ang kapawa, nga patyon Sia. Nagpakig-away sila batok sa ebanghelyo. Ginpahibalo sa ila ni Jesus nga nagdala Sia sing kaluwasan para sa tagsatagsa. Apang yadtong mga nagapamatok sang Iya kapawa nagatagudili sang ila kaugalingon nga magkabuhi kag mapatay sa kadulom.

**Juan 3:19, 20.** Kag amo ini ang paghukom, nga ang kapawa nagkari sa kalibutan, kag ang mga tawo nag-higugma sang kadudolman labi sa kapawa, kay ang ila mga buhat malaut. Kay ang tagsatagsa nga nagabuhat sang malaut nagadumot sang kapawa, kag wala nagapalapit sa kapawa, basi kon ang iya mga buhat magdayag.

### **Buhata Ini**

20. *Hunahunaa:* May nakilala bala ikaw nga mga katawhan nga nagsikway kay Jesus? Ano bala sa imo ang kabangdanan kon ngaa ginbuhat nila ina? Ano ang mahanabo sa ila? Sa hunahuna mo ayhan nga magabaylo ang ila mga paghunahuna kon nakilala nila sing dugang pa gid si Jesus? Paano yadtong mga nagapatumbaya lamang sa paghimo sang pagpamat-od nahanungod sa pagbaton ukon indi kay Jesus — pagsikway bala ini? Daw ano ka makatalagam ini? Ano ayhan sa hunahuna mo ang ginabatyag sang Dios sadtong mga nagsikway sang kaluwasan ginatanyag Niya sa ila sa kay Jesus?

## Pagbaton

Si Jesus nagsaad, \*Ang bisan sin-o nga magsunod sa akon makaangkon sang kapawa sang kabuhi.\* Isa ini ka butang nga maangkon kag isa ka nagapadayon nga inagihan. Si Jesus ang kapawa. Ang pag-angkon sa Iya nagakahulogan man sang pag-angkon sang kapawa sang kabuhi kag ang tanan nga mahatag sang kapawa. Ang pag-angkon sang kapawa sang kalibutan labaw pa sa kaalam, labaw pa sa gahum sang kabubot-on, labaw pa sa pagkakatapo sang isa ka relihiyon. Labaw pa ini sa paghibalo nahanungod kay Jesus ukon paghibalo sang Iya mga ginatudlo. Pag-angkon ini sang mismo kaugalingon ni Jesus subong nga nagapanaag, makagalalum, nagapahayag nga kusog sa imo kabuhi.



Si Jesus nagsiling, \*Ang bisan sin-o nga magsunod sa akon.\* Agud maangkon ang kapawa sang Dios kinahanglan may pagabuhaton kita – magsunod kay Jesus, maglakat sa Iya kapawa. Ang Dios naga-pahayag sang Iya kaugalingon sa tanan nga nagabatong sang kamatuoran kag magsunod sa Iya. Ginatuytoyon Niya kita adlaw-adlaw.

**1 Juan 1:7.** Apang kon nagalakat kita sa kapawa – subong nga sia yara sa kapawa – may paghiambitay kita, kag ang dugo ni Jesus nga iya Anak nagatinlo sa aton sa tanan nga sala.

**Hulubaton 4:18.** Apang ang banas sang matarung subong sang nagapamanagbanag nga kapawa, nga nagasilak sing labi tubtob sa himpit nga adlaw.

Buot mo bala nga magsunod kay Jesus kag mag-angkon sang kapawa sang kabuhi? Hatagi Sia sing hulot sa taga ka bahin sang imo kabuhi karon. Tugoti nga ang masanag Niya nga presensya magtabog sang kadulom. Sunda ang Iya kapawa kag ipakigbahin ini sa mga katawhan nga yara sa palibot nimo. Itugyan ang imo kabuhi sa Iya agud nga mapun-an Niya ini sang Iya kapawa.

**Pangamuyo:** Jesus, magkari ka sa akon kabuhi. Kuhaa ang kadulom sang akon mga sala kag mga kahadlok. Himoa ako nga isa ka bag-o nga tinuga suno sa luyag Mo nga mahimo sa akon. Himoa ako nga nagabanaag paagi sa Imo kapawa. Buligi ako sa pagsunod sa Imo adlaw-adlaw. Salamat bangod sang Imo kapawa.



**Buhata Ini**

21. Sauloha ang 1 Juan 1:7. Ano ang mahimo sang duog ni Jesus para sa aton kon maglakat kita sa Iya kapawa? . . . . .  
. . . . .
  
22. Kon wala pa nimo mabaton si Jesus, buhaton mo bala ini karon? Mahimo nimo gamiton ang pangamuyo nga nasambit diri ukon magpangamuyo ka sa imo kaugalingon nga mga pulong. Kon nabaton na nimo Sia, pasalamat Sia bangod sang Iya kapawa. Pangayoa nga buligan Niya ikaw sa paglakat sa kapawa kag ipakigbahin ini sa iban.

23. Usisaa ang imo mga sabat kag sulati ang imo rekord sang bumolutho para sa leksyon 6.

### Leksyon 6 - Mga Sabat

Ang mga pamangkot nagakinahanglan sang 24 ka mga sabat. Kon may husto ikaw nga sabat halin sa 22 tubtob sa 24, labing maayo; 18 tubtob sa 21, maayo; 13 tubtob nga naghinulsoi sila as ila mga sala kag karon ginapanag-sa 17, Kasarangan. Kon manubo sa 13 ang husto mo nga

1. b) ang pagkawala sang kasanag.
2. k) sala nga nagpahamulag sang tawo sa Dios.
3. Kadulom: kamatayon, malaut, dumoi, sayop.  
Kasanag: kabuhi, kalipay, maayo, gugma, kamatuoran.
4. 1 Juan 1:5.
5. Si Jesus.
6. Ang kapawa sang kabuhi.
7. k) ang presensya ni Jesus sa kabuhi.
9. a) sa Biblia; k) kay Jesus.
11. Sa nawong ni Kristo.
12. Sa aton mga tagipusoon.
13. Ang himaya sang Dios.
15. Adlaw sang pagkamatarung.
17. k) Kapawa sang kalibutan.
18. aton, mga nagalingkod.
21. Nagatinlo sa aton sa tanan nga sala.

Kadamuon sang husto nga mga sabat . . . . .  
Grado . . . . . Karon sulati  
ang imo rekord sang bumolutho para sa Leksyon 6.